

ճարներն (Էդի-քիլիսէ), բերդերը, ամրոցները եւ դղեակների աւերակները թումբերը, այն էլ հինգ-տասը կիլոմետր տարածութեան մէջ, այնքան հետաքրքրական էին, որ մինչեւ քնելը խօսակցութեան նիւթը այդ պատմական յիշատակարանների շուրջն էր: Կընքահայրս բացատրեց, թէ ամբողջ Կոլալում, Ութիում, Կիսկիմում եւ Արզանուչում հայեր էին ապրում. ապա Լալա (Մուսթաֆա) փաշան երեք հարիւր տարի առաջ դորանց կոտորել է. միայն իսլամը դաւանողները ազատուել են 1578 թ. կոտորածից: Դեռ մինչեւ այսօր Ճորոխի աւազանի բոլոր դիւղերում հայհոյում են Լալա-փաշային, իր կատարած այդ անգութ կոտորածի եւ կործանած տաճարների, բերդերի եւ դղեակների համար. սոսց կըքահայրս հառաչելով:

Առաւօտ վաղ Եասամալի լեռների ստորոտով բարձրացանք Եալաուզ-Չամ սարը եւ իջանք Կոլաչէն գիւղը: Երբ մտանք անտառապատ եւ այգեստաններով տարածւած Կոլաչէնի ձորը, անհուն հրճանք զգացի շրջապատի բոյրից, դալարից, պտղալից ծառներից, գոյնզգոյն ծաղիկներից, որոնք ինձ արբեցրին անուշաբոյրով. այլեւս չկային Կարսի լերկ ապառաժները, դեղինած դաշտերը, սեւ հերկերն ու խոզանները. ամէն ինչ զմբուխտի ցոլք ունէր, ամէն քայլափոխին պէս-պէս տեսարաններ: Կոլաչէնումն էլ կար գմբէթն իջած մի աւերակ տաճար,